

मार्निंग डोगरी न्यूज बुलेटिन, समे. 09.20 Hrs

<><><><><><>

Headlines

1. मुखमंत्री उमर अब्दुल्ला होंरे नमीं दिल्ली च बजट शा पैहले आले सलाह-सूत्र च हिस्सा लेइयै जम्मू-कश्मीर सरकार दिएं मुख प्राथमिकताएं ते चेंताएं गी पेश कीता।
2. विकसित भारत-युवा नेता संवाद च कल जम्मू-कश्मीर दे 50 शा मते युवाएं गी प्रधानमंत्री नरेंद्र मोदी हुं'दे कन्नै गल्लबात दा मौका हासल होग।
3. युवा सेवाएं ते खेड्डे सरबंधी मंत्री सतीश शर्मा होंरे केंद्री खेड्ड मंत्री होंरे गी इक जापन देइयै जम्मू-कश्मीर लेई खेड्ड ढांचे दे बाददे विस्तार दी मंग कीती।
4. जम्मू-कश्मीर सरकार दी बशेश पैहलकदमी JK MEME Health Clinic गी कल नमीं दिल्ली च बडे मते प्रतिशठा आले SKOCH Gold कन्नै सम्मानत कीता गेआ।
5. जम्मू-कश्मीर स्कूली शिक्षा बोर्ड नै 10मीं जमात लेई डेटशलट जारी करी दिती ऐ। म्तेहान 17 फरवरी शा शुरू होडन।

<><><><><><>

CM Pre-Budget

मुखमंत्री उमर अब्दुल्ला होंरे केंद्री खजना मंत्री निर्मला सीतारमण हुं'दी प्रधानता तैहत कल नमीं दिल्ली च बजट शा पैहले लाई गेदी सलाह सूत्र आली बैठक च हिस्सा लैता ते 2026-27

दे केंद्री बजट लेई जम्मू-कश्मीर सरकार दिएं मुख प्राथमिकताएं ते चैंताएं गी पेश कीता। उमर होरें केंद्र शासत प्रदेश दिएं माली चुनौतिएं, विकास बाद्दे आली प्राथमिकताएं ते संसाधनें दी कमी गी दूर करने लेई मजबूत संस्थागत सहयोग दी जरूरतै पर जोर पाया। मुखमंत्री होरें प्रदेश च विकास ते कल्याणकारी गतिविधिं गी बढ़ावा देने लेई औंदे केंद्री बजट थमां अपनिं मेदें पर बी लोस पाई। ध्यानजोग ऐ जे संसद दा बजट इजलास इस म्हीने दी 28 तरीक थमां शुरू कीते जाने दा अधिकारिक तौर पर ऐलान करी दिता गेदा ऐ।

<><><><><><>

JK Young Leader's Dialouge

नमीं दिल्ली च आयोजित विकसित भारत यंग लीडर्स डायलाग आले कार्यक्रम च जम्मू-कश्मीर दे 50 शा मते नौजवानें सने देश-बदेश थमां आए दे 3 जहार युवा प्रतिभागिं गी कल प्रधानमंत्री नरेंद्र मोदी हुंदे कन्नै गल्लबात करने दा मौका मिलग। विकसित भारत युवा नेता संवाद दे 2026 बरे आले संस्करण लेई चुने गेदे प्रतिभागी 10 बक्ख-बक्ख विशें आली प्रस्तुतिं दे कन्नोकन्नी युवां दी अगुवाई आले नजरिये ते राश्ट्री महत्व आले मुख खेतरें बारें अपने बचार प्रधानमंत्री हुंदे अग्गे पेश करडन। एहदे शा पैहले एल.जी मनोज सिन्हा होरें जंदी 7 जनवरी गी जम्मू-कश्मीर दे दस्ते गी वर्चुअल ढंगै नै इंडी दस्सियै रवाना कीता हा।

<><><><><><>

Satish-Mandaviya

युवा सेवा ते खेड्ढ मैहकमे दे मंत्री सतीश शर्मा होरें नमीं दिल्ली च केंद्री खेड्ढ मंत्री मनसुख मांडविया हुंदे कन्नै मलाटी कीती ते जम्मू-कश्मीर च खेड्ढ ढांचे गी होर मजबूत करने पर

विचार-विमर्श कीता। श्रीनगर लेई अंतरराष्ट्री मानकें स्हाबै क्रिकेट स्टेडियम, बन्ने आहले इलाकें च खेड्ड विकास सर्कट्स ते खेड्डें राएं युवाएं गी रोजगार उपलब्ध करोआने बारै सतीश शर्मा होरें इक जापन केंद्री मंत्री होरें गी सौंपेआ। उनें पानी ते स्यालू खेड्डें लेई मदद ते रूकी पेदी परियोजनाएं च नमी जान भरने बारै बी चर्चा कीती। उनें विश्वास जाहिर कीता जे खेलो इंडिया नजरिए ते राश्ट्री खेड्ड विकास एजेंडे स्हाबै प्रस्ताव जम्मू-कश्मीर गी मुखै च खेड्डें दे केंद्र दे तौर पर कायम करने च मदद करडन।

<><><><><><>

Tourism-Seminar

सैलसफा निदेशालय जम्मू आसेआ सैलसफा गी बढ़ावा देने लेई जम्मू च इक सेमीनार दा आयोजन कीता गेआ। इस दरान लगातार ते टिकाउ ते सैलसफा दे पूरे-पराते विकास बारै नजरिया सांझा कीता गेआ। एहदा मकसद जम्मू खिते च सैलसफा समर्थ गी बढ़ावा देना ऐ ते मजहूरियत आहले नजरिए गी बढ़ावा देना बी ऐ। सैलसफा मैहकमे दिएं डिप्टी ड्रैक्टर सविता चौहान ते होर दुए अधिकारिए कार्यक्रम च शिरकत कीती।

<><><><><><>

JK MSME Award

जम्मू-कश्मीर दे उद्योग ते बपार मैहकमे दी बड़ी महत्वै आहली पैहलकदमी JK MSME Health Clinic गी कल नमीं दिल्ली च आयोजित SKOCH सम्मेलन दरान बड़ी मती प्रतिष्ठा आले SKOCH गोल्ड अवार्ड कन्नै सम्मानत कीता गेआ ऐ। मुख सचिव अटल डुल्लू हुं'दे मार्गदर्शन

आली एह पैहल औद्योगिक तनाs दा पता लाने ते ओदा तौले नबेड़ा करने पर केंद्रित ऐ। उद्योग विभाग जम्मू दे ड्रैक्टर डॉ. अरूण मन्हास हों ऐह पुरस्कार हासल कीता ते आखेआ जे जिस चाल्ली इक डॉक्टर बमारी दा पता लाइयै ओदा इलाज करदा ऐ, ठीक उससै चाल्ली एह पैहलकदमी बी MSME उद्योगें गी पेश औने आले तनाs दा तौले पता लाइयै उसी ठीक करदी ऐ।

<><><><><><>

10th Datesheet

जम्मू-कश्मीर स्कूली शिक्षा बोर्ड आसेआ जम्मू खिते दी समर ज़ोन च 10मी जमात दे म्तेहानें लेई डेटशीट जारी कीती गई ऐ। एह म्तेहान 17 फरवरी गी शुरू होडन ते 10 मार्च गी सम्पन्न होई जाडन। म्तेहान बड्डलै 10 बजे थमां दपैही 1 बजे तगर होग। विद्यार्थिं गी आखेआ गेआ ऐ जे ओह JKBOSE टी अधिकारिक वेबसाइट <https://jkbose.nic.in/> पर डेटशीट दिक्खी लैन। बोर्ड नै विद्यार्थिं गी अपील कीती ऐ जे ओह म्तेहानें लेई पूरी मेहनत कन्नै त्त्यारी करन। बोर्ड नै म्तेहानें गी पारदर्शिता कन्नै करोआने दा बी भरोसा दोआया ऐ।

<><><><><><>

Lohri

लोहड़ी उत्सव-2026 दा सरिस्ता कल ऐतिहासिक मुबारकमंडी विरासती परिसर जम्मू च कीता गेआ। एहदा आयोजन सैलसफा मैहकमे नै जिला प्रशासन दे सहयोग कन्नै कीता। इस कार्यक्रम दा मकसद खिते दी समृद्ध सांस्कृतिक विरासत गी उजागर करना हा। एहदे च मुकामी

कलाकारें आसेआ रिवायती छज्जा नाच, जागरना ते होर दुइयां प्रस्तुतियां दितियां गेइयां। सांसद सत शर्मा, विधायक युद्धवीर सेट्ठी ते सैलसफा निदेशक विकास गुप्ता होर इस मौके पर मौजूद हे। लोक संगीता, नाच दे अलावा डोगरी खानपान दे बी कई स्टाल लाए गेदे हे जिनेंगी उत्थे मौजूदा लोकें बड़ा मता सराहेआ।

<><><><><><>

Karate Felicitation

उत्तराखंड दे ऋषिकेश च आयोजित 6मीं ISKO india Karate Championship-2025 दे जेतूंगी उधमपुर दे पंचैरी आले सरकारी हायर सैकेंडरी स्कूल च शिक्षा मंत्री सकीना इतू होरें सम्मानत कीता। इस कार्यक्रम दरान जम्मू-कश्मीर दे दूर-दरेडे इलाके दिएं ओकड़ी युवा कुड़िएं सने विद्यार्थिएं गी सम्मान दित्ता गेआ जि'नें राष्ट्री स्तर दी इस प्रतियोगिता च शानदार प्रदर्शन कीता ऐ। मंत्री होरं इ'नें बच्चें दी निष्ठा, अनुशासनते सख्त मेहनत दी सराहना करदे होई उं'दा दिल बधाया ।

<><><><><><>

Road Safety Month

राश्ट्री शिड़क सप्ताह दे चलदे ट्रैफिक पुलस आसेआ जिला कनूनी सेवा सरबंधी प्राधिकरण दे सहयोग कन्नै भद्रवाह दे सेरी बजार च इक जागरूकता कार्यक्रम दा सरिस्ता कीता गेआ। एहदा मकसद ट्रैफिक नियमें दी पालमा, मोटर गड्डिएं दे कनून सरबंधी प्रावधान बारै जानकारी ते सुरक्षित ढंगै सिर गड्डियां चलाने बारे लोकें गी जानकार बनाना हा। डिप्टी एस.पी ट्रैफिक

फारूक खतीब हॉरें डरैवरें च चाकलेट्स बंडे। एहदा मकसद ट्रैफिक नियमें दी पालमा करने लेई उ'नेंगी प्रेरित करना हा। उनें शिड़क पर गड्डी चलांदे बेल्ले पूरी जिम्मेदारी कन्ने अपनी लैन च चलने, शिड़क सुरक्षा दे नियमें दी पालमा करने लेई सभनें गी जानकार बनाया।

<><><><><><>